

**ԹՐԱԿԱ-ԿԻՄԵՐԱԿԱՆ ՑԵՂԵՐԻ ՄԻՈՒԹՅՈՒՆՆԵՐԸ ՀԱՅԿԱԿԱՆ
ԼԵՌՆԱՇԽԱՐՀՈՒՄ (մ. թ. ա. VI—V դդ.)**

Ս. Գ. ՊԵՏՐՈՍՅԱՆ

Հինթրական ցեղերի թափանցումը Հայկական լեռնաշխարհ՝ սկսվելով մ. թ. ա. XII դարում, հեթական պետության կործանումից անմիջապես հետո, շարունակվում էր նաև հետագայում։ Այդ ընթացքում թրակա-փոյուզական ազգակից լեզուներով խոսող մի շարք ցեղեր Փոքր Ասիայի վրայով շարժվելով արևելք, հաստատվում են լեռնաշխարհի տարբեր, առաջին հերթին արևմտյան և հարավ-արևմտյան, շրջաններում¹։ Դրանցից էին՝ փոյուզացի-միսիացիները (մուշկերը), արիմ-ուրումեացիները (արմենները), ալիզոները, օդոմանտները, մոկսիանները և այլն²։

Հինթրական ցեղերի մեկ ուրիշ խումբ, որը պատկանում էր թրակա-կիմերական ընդհանրությանը, Հայկական լեռնաշխարհի հյուսիսային և հյուսիս-արևելյան շրջաններն էր թափանցել հյուսիսից՝ Կովկասի վրայով։ Դրանք կիմերներն էին, սարապարները, տրերները և նրանց ցեղակիցները³։ Այս վերջին առիթով պետք է նկատի առնել, որ հինթրական էթնիկական տարրը մ. թ. ա. II—I հազարամյակների սահմանազխին բնակվելիս է եղել ոչ միայն Բալկանյան և Փոքրասիական թերակղզիներում (թրակա-փոյուզական ընդհանրությունը), այլև արդի Ուկրաինայի հարավում և նրանից հարավ-արևելք ու արևելք ընկած շրջաններում (թրակա-կիմերական ընդհանրությունը)։ Գիտությունն հայտնի են մերձագոյվյան շրջաններում և Հյուսիսային

¹ E. A. Vallis Budge, L. W. King, *Annals of the Kings of Assyria*, v. I. London, 1902, էջ 35—36; Н. М. Дьяконов, *Предыстория армянского народа*, Ереван, 1968, էջ 117—119։

² Ս. Ս. Երեմյան, Հայկական առաջին պետական կազմավորումները, «Պատմա-բանասիրական հանդես», 1968, № 3, էջ 92։ Նույնի՝ Հայ ժողովրդի կազմավորման ընթացքը, «Պատմա-բանասիրական հանդես», 1970, № 2, էջ 37—43։ «Հայ ժողովրդի պատմություն», հատ. Ա, Երևան, 1971, էջ 230—237։

³ Strabo, XI, 5, 2 և XI, 14, 14։ Հ. Մանանդյան, Հին Հայաստանի և Անդրկովկասի մի քանի պորթլեմների մասին, Երևան, 1944, էջ 6—13։ Ս. Ս. Երեմյան, Կիմերական և սկյութական ցեղերի արշավանքները և Ուրարտուի ու Ասորեստանի պայքարը քոչվորների դեմ, «Պատմա-բանասիրական հանդես», 1968, № 2, էջ 90—92։ Կիմերների թրակական ծագման օգտին ավելի որոշակի խոսում է Մ. Ի. Արտամոնովը՝ նա գրում է. «Չնայած այն բանին, որ իրանական են ճանաչվում Փոքր Ասիայում հանդես եկած կիմերական թագավորների անունները, ավելի շատ տվյալներ կան կիմերների մոտիկության վերաբերյալ ոչ թե սկյութների և ոչ թե Կովկասի բնիկների, ինչպիսիք էին մեոտները, առավել ևս ոչ թե լեռնային Ղրիմի տավրերի, որոնց մեջ կատակոմբային մշակույթը տարածում էր դոնի, այլ Փոքր Ասիայի և Բալկանյան թերակղզու հին բնակչության, մասնավորապես թրակացիների հետ։ Այդ է վկայում և Ստրաբոնից (էրատոսթենեսից) սկիզբ առնող գրական ավանդույթը և թրակական ու բոսպորյան թագավորների անունների նույնությունը...» (Մ. Ի. Артамонов, Киммерийцы и скифы, Л., 1974, էջ 63, տե՛ս նաև նույն աշխատության 22, 85 և 125 էջերը)։

Կովկասում թրակա-կիմերական ցեղերի երբեմնի գոյությունը հաստատող մի շարք տվյալներ⁴:

Թրակա-կիմերական ցեղերի առանձին հատվածների կողմից Կովկասյան լեռնանցքները հաղթահարելն ու Հայկական լեռնաշխարհ թափանցելը սկսվել էր ավելի վաղ ժամանակներում, քան կիմերների գլխավորությամբ դեպի Իրան, Միջագետք և Փոքր Ասիա (մ. թ. ա. VIII—VII դդ. ընթացքում) նրանց ձեռնարկած պատմական ներխուժումները: Իսկ վերջիններս տեղի էին ունենում Անդրկովկասի և Հայկական լեռնաշխարհի վրայով⁵:

Հայկական լեռնաշխարհի հյուսիսում և հարակից շրջաններում թրակա-կիմերական ցեղերի բնակության փաստը իր արձագանքն էր գտել թե՛ ժամանակի ասուրա-բաբելական արձանագրություններում, թե՛ հետագայի հույն հեղինակների երկերում: Այդ ցեղերից կիմերները այստեղ հիշատակվում են արդեն մ. թ. ա. VIII դարում: Ուրարտուում ասորեստանցի հետախույզ Աշշուրիսուայի զեկուցագրի մեջ, որը կազմվել է 722—715 թթ. միջև⁶, նշվում էր, որ Գուրիանիա երկիրը գտնվում է Ուրարտու երկրի և Գամիռայի միջև: Գուրիանիա-ն ստրաբոնյան գուրանիացիներ-ի⁷ երկիրն է՝ ուրարտական Վուրիանի-ն⁸, իսկ նրանից հյուսիս գտնված Գամիռա-ն՝ կիմերների երկիրը:

Հայկական լեռնաշխարհի հյուսիսում մ. թ. ա. VIII—VII դդ. ընթացքում կիմերները և նրանց աղգակից մյուս ցեղերը բավական մեծ տարածություն էին զբաղեցնում: Նշելով, որ կիմերների բնակության տարածքը ներառում էր նաև այժմյան Հենինականի շրջակայքը (Հայկական ՍՍՀ Ախուրյանի և Ղուկասյանի շրջանները), Ս. Տ. Երեմյանը ենթադրում է, որ նրանց հիմնական մասը, ցեղակից տրեքների նման, պետք է բնակվեր ավելի հյուսիս՝ Շիրակի և Կուր գետի միջև ընկած տարածություններում⁹:

Հետագա Գուգարքի հյուսիսային մասում տրեքների երբեմնի բնակության իրողությունը իր արտացոլումն է գտել տրեքների ցեղանունը պահած

⁴ В. Д. Блаватский, Киммерийский вопрос и Пантикапей, «Вестник МГУ», 1948, № 8, էջ 9—12; Л. А. Ельницкий, Киммерийцы и киммерийская культура, «Вестник древней истории», 1949, № 3, էջ 14—18; Ю. С. Крушкoл, К вопросу о киммерийцах, «Археология и история Боспора», Симферополь, 1952, էջ 89—91; Е. И. Крупнов, Киммерийцы на Северном Кавказе (по археологическим данным), «Древние племена и народности Кавказа», Материалы и исследования по археологии СССР, № 68, М.—Л., 1958, էջ 176—195; М. И. Артамонов, նշվ. աշխ., էջ 20—23, 63:

⁵ М. И. Артамонов, Вопрос о происхождении скифов, ВДИ, 1950, № 2, էջ 47; И. Л. Лавров, О пути вторжения киммерийцев в Переднюю Азию, «Советская археология», 1965, № 3, էջ 219—223; Հ. Մանանդյան, նշվ. աշխ., էջ 6—10, 13:

⁶ Б. Б. Пиотровский, История и культура Урарту, Ереван, 1944, էջ 295—296; նույնի՝ Ванское царство, М., 1959, էջ 231—232; И. М. Дьяконов, История Мидии, М.—Л., 1956, էջ 235—236:

⁷ Strabo, XI, 14, 14.

⁸ Հ. Մանանդյան, նշվ. աշխ., էջ 10: Հիշյալ Գամիռա երկիրը մի ժամանակ թյուրիսացարար տեղագրվում էր հետագա Կապադովկիայում (հայ. Գամիրի): Սակայն, ինչպես Հ. Մանանդյանն էր գրում, ռշատ պարզ է, ուրեմն, որ կիմերների երկիրը, որն Ուրարտուի հյուսիս-արևմուտքում գտնված Gurlanti-Kuriani-ի թիկունքումն էր՝ ոչ թե Կապադովկիայում պետք է լիներ, այլ Ուրարտուի հյուսիսում, հավանորեն այժմյան Ախալթալա-Ախալցխայի մոտակա շրջաններում» (Հ. Մանանդյան, նշվ. աշխ., էջ 10):

⁹ Ս. Տ. Երեմյան, Կիմերական և սկյութական ցեղերի արշավանքները... («Պատմա-բանասիրական հանդես», 1968, № 2, էջ 92):

Թրիարե երկրի (regio Thriare) մասին Պլինիոսի հաղորդած հետևյալ տեղեկությունն մեզ. «Թասիեի (հավանորեն, Տաշիր) և Տրիարեի (հավանորեն, Թրիալեթ) երկիրը տարածվում էր մինչև Պարիադրեսյան լեռները. սրանցից վերև Կողքիսի ամալի վայրերն են, որոնց կողքին՝ Կերավնյան լեռների դիմաց, ապրում են արմենոիալյուբները»¹⁰,

Տրերների ցեղանունն է առկա նաև Գուգարքի հյուսիսային գավառներից մեկի հայկական Թեղի և վրացական Թրիալեթի անվանումների մեջ¹¹, «Այս անվան ավելի արխաիկ ձևը, — գրում է Ս. Տ. Երեմյանը, — պետք է լինի «թրիար» (<«թորի + ար»), որը պահպանվել է Պլինիոսի մոտ՝ regio Thriare: Վրացերենի տեսակետից այս վերջինիս օրինաչափ ձևն է «թրիալեթ-ի»... Մեջբերված անուններում պահպանվել է տրերների՝ թրակական ցեղերից մեկի անունը»¹²,

Հետագա Շիրակում և հարակից շրջաններում կիմերներից բացի բնակություն էին հաստատել թրակա-կիմերական ուրիշ ցեղեր ևս: Դրանցից մեկի վերաբերյալ Ստրաբոնը հաղորդում է հետևյալը. «Ասում են, որ նաև թրակացիներից ոմանք, որ անվանվում են սարապարաներ, այսինքն՝ գլուխ կրտորդներ (χερσιδωτοι) ապրում էին Արմենիայից վերև և հարևան էին գուրանիացիներին (Γουρσάνιοι) և մեղացիներին. դրանք գաղանաբարո և անսանձ լեռնականներ էին, գլուխ կտրող և սկյութացիների նման դանգ մորթազերծող, և հենց այդ նշանակությունն ունի սարապարան»¹³,

Սարապարների Շիրակում հաստատվելու ժամանակաշրջանը Հ. Մանանդյանը ենթադրում է մ. թ. ա. VII—VI դդ. սահմանազխին: Նա գրում է. «Ուրարտական թագավորության թուլացման և քայքայման ժամանակ կիմերները և նրանց հետ եկած սկյութական և թրակիական դաշնակից ալլ ցեղերը, ըստ երևույթին, տարածվել էին դեպի հարավ և գրավել էին Շիրակը և Վանանդը: Ստրաբոնի մոտ հիշատակված սարապարանները, հավանորեն, այդ ցեղերից մեկն էին»¹⁴,

* * *

Ուրարտական պետության թուլացման ժամանակաշրջանում (մ. թ. ա. VII դարի կեսից սկսած) Արարատյան դաշտից հյուսիս և հյուսիս-արևելք ընկած երկրները ոչ միայն կարողացան թոթափել ուրարտական լուծը, այլև ի վիճակի եղան համախմբվելու և ստեղծելու բավականաչափ ուժեղ ցեղամիություններ: Այդ պրոցեսները հիմնականում ընթանում էին երկու կենտրոնների շուրջ: Մեկը Սևանա լճի ավազանն էր (և հատկապես հետագա Գեղաքունի գավառը), որտեղ գեոևս մ. թ. ա. VIII դարում գոյություն ունեւ Ուեդուրի-էթիունի ցեղամիությունը¹⁵, իսկ մյուսը՝ Շիրակ-Արշարունիքը¹⁶: Ըստ

¹⁰ Plin., Nat. Hist., VI, 11 (տե՛ս Հ. Մանանդյան, նշվ. աշխ., էջ 12):

¹¹ Ն. Ադոնց, Հայաստանի պատմություն, Երևան, 1972, էջ 315, ծան. 2: Ս. Տ. Երեմյան, Ն. Մանուկ ՎII դարի հայոց «Աշխարհացոյց»-ը (տե՛ս «Մանուկ և հայագիտության հարցեր», Երևան, 1968, էջ 82):

¹² Ս. Տ. Երեմյան, Կիմերական և սկյութական ցեղերի արշավանքները... («Պատմա-բանասիրական հանդես», 1968, № 2, էջ 92):

¹³ Strabo, XI, 14, 14 (տե՛ս Հ. Մանանդյան, նշվ. աշխ., էջ 11):

¹⁴ Հ. Մանանդյան, նշվ. աշխ., էջ 12:

¹⁵ Н. В. Арутюнян, Новые урартские надписи Кармир-Блуря, Ереван, 1966, էջ 88—89: Նույնի՝ Бпайинли (Урарту), Ереван, 1970, էջ 434—435:

¹⁶ Հ. Մանանդյան, նշվ. աշխ., էջ 20—23:

14 Հանդես, № 1

այսմ, զարմանալի չէ, որ վաղ միջնադարում Հայկական լեռնաշխարհի հյուսիս-արևելքում իշխած բուն հայկական ժագմամբ նախարարական տոհմերը (իսկ դրանք բացարձակ մեծամասնություն էին կազմում օտարածին մյուս նախարարական տոհմերի համեմատությամբ) սերած էին համարվում կա՛մ Գեղամից (և նրա սերունդներից), կա՛մ Շարայից (և նրա սերունդներից)¹⁷։ Սրանցից առաջինը՝ Գեղամը, Դեղաքունի երկրի և նրան իր անունը տված գեղ ցեղի էպոնիմն է՝¹⁸, իսկ երկրորդը՝ Շարան, Շիրակ-Արշարունիքի և, ինչպես կտեսնենք ստորև, այստեղ իշխած սարապար ցեղի։

Բերենք հին Հայաստանում Շարայի և նրա զարմերի մասին գոյություն ունեցած և Մովսես Խորենացու շնորհիվ մեզ հասած ավանդազրույցների այն պատառիկները, որոնք կարևոր են տվյալ հարցի պարզաբանման համար։

1. «Եւ [Արամայիսը] զորդի իւր Շարայ, զյուովածին եւ զշատակեր, առաքէ ամենայն աղիսիւ իւրով ի դաշտ մի մօտաւոր, արգաւանդ եւ բերրի, յորում գնան ջուրք ոչ սակաւք, ի թիկունս հիւսիսոյ լերինն, որ անուանեցաւ Արագած, յորոյ անուն եւ զգաւառն ասեն անուանեալ Շիրակ»¹⁹։

2. «Իսկ Գուշարայ, որ որդւոցն Շարայի, ժառանգեաց զլեռն Մթին, որ է Կանգարք, եւ զկէս մասինն Զաւախաց, զԿողբ, զԾոր, զԶոր, մինչև ցամուրն Հնարակերտ»²⁰։

3. «Բայց զտէրութիւնն Աշոցայ, եւ զսեպհականութիւնն Տաշրաց կարգէ վաղարշակ [արքան] ի զաւակացն Գուշարայ Հայկազնոյ»²¹։

Խորենացու հաղորդած այս տեղեկություններից ելնելով, Շարային և նրա զարմերին կարող ենք համարել այս նույն կողմերում մինչև հայ ժողովրդի կազմավորումը գոյություն ունեցած սարապար ցեղի և նրան ազգակից թրակա-կիմերական մյուս ցեղերի էպոնիմ-նախնիները՝ նրանց բանահյուսական անձնավորումները։ Հենց այս ցեղերի տոհմա-ցեղային ավագանու ներկայացուցիչներից էին սերած լինելու հին հայկական այն տոհմերը, որոնք իշխում էին Մեծ Հայքի Շիրակ, Արշարունիք, Աշոցք, Տաշիր, Զավախք, Կանգարք, Կողբ (Կողբոփոր), Ծոր (Ծորոփոր) և Զոր (Զորոփոր) գավառներում²²։

¹⁷ Մովսես Խորենացի, Պատմութիւն Հայոց, Ա, ժր։ Բ, է, Ը։

¹⁸ Н. Адонц, Армения в эпоху Юстиниана, Ереван, 1971, էջ 303։ Гр. Капанцян, Историко-лингвистические работы, т. I, Ереван, 1956, էջ 187։

¹⁹ Խորենացի, Ա, ժր։ Շարայի ավանդազրույցի գրառման ժամանակաշրջանում Շիրակը և Արշարունիքը առանձին վարչական միավորներ էին։ Սակայն ավելի վաղ ժամանակներում նրանք կազմում էին մեկ ամբողջություն (հիշենք, որ Կամսարական նախարարները կոչվում էին «տեարք Շիրակայ և Աշարունեաց»)։ Այս իսկ պատճառով, Շարայի կերպարը Շիրակում ունեցած տեղայնացմամբ հանդերձ, իր անվամբ կապվում է ոչ թե նրա, այլ Արշարունիք (<Աշարունիք) տեղանվան հետ (տե՛ս Гр. Капанцян, Историко-лингвистические работы, т. II, Ереван, 1975, էջ 118—121)։ Շարան Արշարունիքի հետ է կապվում, թերևս, նաև երաստի՝ Արամայիսի թոռան (այսինքն՝ Շարայի որդու) միջոցով։ Ըստ Խորենացու բերած ժողովրդական ստուգաբանության (նույն տեղում), Երաստի անունն էր կրում Երասիս գետը։ Իսկ իր Երասիսամերձ գիրքի պատճառով Արշարունիքը կոչվում էր նաև Երասիսաձոր։

²⁰ Խորենացի, Բ, Ը։

²¹ Նույն տեղում։

²² Հ. Մանանդյանը Շարային համարում էր ավելի ուշ Շիրակի տարածք թափանցած սարմատական լիթնիկական տարրի էպոնիմը (նշվ. աշխ., էջ 31—33)։ Դրա համար նա հիմք

Շարա-սարապար գույգի փոխադարձ կապի մասին է խոսում ոչ միայն աշխարհագրական միջավայրի նույնության (Շիրակ-Արշարունիքում ունեցած իրենց տեղադրությամբ), այլև լեզվա-ծագումնաբանական ակնհայտ աղերսի գործոնը: Սարապար (հուն. Σαρπαρ) ցեղանվան «գլուխ կտրող» (հուն. κεφαλοτομος) ստուգաբանությունը, որը ելնում է այս ցեղանվան առաջին մասի իրանական սար («գլուխ») բառի հետ մերձեցումից, պետք է համարել ժողովրդական ակունքներ ունեցող ոչ-գիտական ստուգաբանություն²³: Հավանաբար, սարապար-ը արտացոլումն է տեղական *շարապար-ի (հունարենը շ շունի և նրա դիմաց պետք է դնել իր ս-ն): Վերականգնված *շարապար-ը կարելի է բաժանել շարա և պար բաղադրիչների՝ դրանցից առաջինը նույնացնելով այն կրած ցեղի (սարապարների) էպոնիմ-նախնու Շարա (Շարայ) անվան հետ: Շար(ա) բաղադրիչն առկա է նաև Աշարունի (<*ա-շար-ունի) նախարարական տոհմանվան և նրանից սերած Աշարունի (>Արշարունիք) տեղանվան մեջ²⁴: Սար(ա) < *շար(ա) փոխակերպության օգտին է խոսում ներքոհիշյալ հանգամանքը ևս:

Ինչպես տեսանք, Ստրաբոնը սարապարներին համարում էր հարևան ոչ միայն գուրանիացիներին, այլև մարերին (մեդացիներին): Վերջին դեպքում, անտարակույս, նկատի է առնված սարապարների այն հատվածը, որը բնակվելով այժմյան Նախիջևանի ԻՍՍՀ տարածքում մերձարաքսյան շրջաններում սահմանակցել է մարերի հետ: Այժմյան Նախիջևանի ԻՍՍՀ Նյուսիս-արևմտյան մասը բռնած Շարուր գավառի անվան մեջ առկա է նույն շար(ա) բաղադրիչը: Դարձյալ սարապարական տարրի հետ կապվող այս տեղանվան ստուգաբանության առնչությամբ, Գր. Ղափանցյանը գրում է. «Կասկած չկա, որ šar(a) էթնիկական անվանումից է կազմված նաև հայկական Շարուր, Šarur գավառի անունը... Ašaruni(kh) գավառի Šarur գաղտից ունեցած որոշ հեռավորությունը չի կարող արգելք հանդիսանալ ծագումնաբանական այսպիսի մեկնաբանության համար, քանի որ միևնույն ցեղի անուղերը հեշտությամբ կարող էին տարաբնակվել և հեռանալ»²⁵:

Այսպիսով, Շարա-Աշարունի-Շարուր անվանումների ծագումնաբանական փոխադարձ կապի մեջ գտնվող շարքը, Շիրակ-Արշարունիք-Շարուր տարածքում իր տեղայնացմամբ, առնչվելով աշխարհագրական նույն միջավայ-

էր ընդունում Շարա և սարմատ (ըստ նրա՝ *շարմատ) անունների հնչյունական նմանությունը: Սակայն այժմ կարելի է ապացուցված համարել, որ սարմատ (հուն. Σαρματ) ցեղանվան նախատիպը երբևէ *շարմատ տեսքը չի ունեցել: Ըստ Վ. Ի. Աբաևի, ցեղանվան ավելի հին (մ. թ. ա. V դարից հայտնի) սավրմատ ձևը (հուն. Σαρδοματ) ենթադրում է սկյութա-սարմատական լեզուների *sāwāmat(a) նախատիպը (նրա բաղադրիչները՝ sau «սև», arn «ձեռք», 1 ք «-ներ» ձևերով, առկա են այսօրվա օսերենում ևս. տե՛ս В. И. Абеев, Осетинский язык и фольклор, т. I, М.—Л., 1949, էջ 37): Նշանակում է. Շարա անունը ոչ մի ընդհանուր բան չունի սարմատ կամ սավրմատ (<sāwāmat-) ցեղանվան հետ:

²³ Ինչ վերաբերում է պարտված թշնամու դուրսը կտրել-վերցնելու սովորույթին, որի համար էլ, իբրև թե, սարապարները կրում էին այդ ցեղանունը, ապա պետք է նկատել (այն մատնանշվել էր դեռևս Հ. Մանանդյանի կողմից, նշվ. աշխ., էջ 11, ծան. 2), որ Հայկական լեռնաշխարհի ցեղերից «գլուխ կտրողներ» էին նաև խալդեերը (Xen., Anabasis, IV.7, 16): Այս սովորույթը գոյատևում էր վաղ միջնադարյան Հայաստանում ևս:

²⁴ Гр. Капанцян, Историко-лингвистические работы, т. II, էջ 121:

²⁵ Նույն տեղում, էջ 122:

ընդ ունեցած սարապարների հետ, վկայում է, որ նրանց ցեղանվան տեղական-հայկական արտահայտությունը, իրոք, եղել է *շարա-պար:

Ինչ վերաբերում է քննարկվող ցեղանվան երկրորդ պար բաղադրիչին, ապա, մեր ենթադրությամբ, այն հինթրակյան ցեղանվանակերտ մասնիկ է՝ ծագած հնդեվրոպական նախալեզվի *per- «ծնել, սերել» արմատից²⁶: Ըստ այսմ, սարապար < շարա-պար նշանակելու է «Շարայածին», այսինքն՝ «Շարայի ցեղ» (հմմտ. Հայկ և Հայկազն, Արամ և Արամազնեայլ): Հավանաբար, այս նույն իմաստով էր պար-ը նախապես գործածվում նաև բուն Թրակիայում (արդի Բուլղարիան): Անտիկ ժամանակներում այնտեղ հայտնի էին պար բաղադրիչը պարունակող բազմաթիվ տեղանուններ²⁷ (իմաստային անցման տեսակետից հմմտ. իրանական զանազան տերմիններ, որը նախապես նշանակում էր «ցեղ» կամ «տոհմ», ապա՝ «տոհմա-ցեղային բնակավայր» > «բնակավայր»):

* * *

Վերևում տեսանք, որ Թրակա-կիմերական ցեղերը բնակություն էին հաստատել ոչ միայն Շիրակ-Արշարունիքում, այլև նրանից հյուսիս՝ մինչև Կուր գետը ձգվող տարածություններում: Դրանցից մեկն էին տրերները՝ բնակված Կուրի աջափնյակը բռնող և իրենց անունը կրող Թրիարե երկրում (Թռեղքը ավելի լայն սահմաններում)²⁸: Վերջինիցս հարավ բնակություն էր հաստատել, ամենայն հավանականությամբ, նույնպես Թրակա-կիմերական մեկ ուրիշ ցեղ, որի էությունը Դուշարը, համաձայն հնորենացու բերած ժողովրդական ավանդության, Շարայի որդին էր: Վաղուց է ցույց տրված, որ Դուշարը թե՛ իր անվամբ և թե՛ իր տեղայնացմամբ կապվում է Դուգարքի և նրան իր անունը տված գուգար ցեղի հետ²⁹: Երկու հանգամանք՝ մեկը Շարայի հետ Դուշարի հանդես բերած սերտ ազդակցությունը, մյուսը Դուշարի զարմերի ժառանգած տիրույթների միջակա դիրքը սարապարական Շիրակի և տրերական Թրիա-

²⁶ Հմմտ. լատիներեն նույնարմատ pario «ծնել», լույս աշխարհ բերել» և parens «ծնող» բառերը: Բայց կա նաև դակերեն per (<հ.-հ. *puer-) «տղա, որդի» բառը՝ ազգակից լատիներեն puer «երեխա, տղա, որդի» բառին (օրինակ, հայտնի է Decebalus per Scorilo «Դեկեբալ որդի Սկորիլի»): տե՛ս В. И. Георгиев. Исследования по сравнительно-историческому языкознанию, М., 1958, էջ 128):

²⁷ Դրանցից են, օրինակ, Բուգիպարա, Բեսապարա, Սկասկոպարա, Բենդիպարա և այլն (տե՛ս Атлас по Българска история, изд.-во БАН, София, 1963, էջ 3—4): Մեր *շարապար ցեղանվան իր կազմությամբ ավելի մոտ է հիշյալ տեղանուններից վերջինը, որի հիմքում ընկած է Թրակյան Βεγρις գիցանունը (Βεγρις=հուն. Արտեմիս, տե՛ս «Древнегреческо-русский словарь», т. I, М., 1958, էջ 293):

²⁸ Թրիարե երկիրը, հավանաբար, տարածվում էր ոչ միայն Թրիակեթի լեռնաշղթայից հարավ ընկած շրջաններում (ինչպես հետագա Թռեղքը), այլև նրանից հյուսիս: Այստեղ բնակված տրերական էթնիկական տարրի հետ պետք է մասնավորապես կապել Կուրի աջակողմյան վտակներից մեկի (ակունքները գտնվում են Թրիակեթի լեռնաշղթայի հյուսիսային լանջերում) Տանա անունը: Ըստ Երևույթին, այն երկվորյակն է Դոն գետի Թրակա-կիմերական Տանա-իս (հուն. Τάναις) անվան իսկ վերջինս համարվում է նույն գետի սկյութա-սարմատական Դոն <*Dān անվան դուգահեռը (հմմտ. օսերեն don <*dān «չոր», «գետ»): Այս գետի ստորին հոսանքի շրջանում բնակված Թրակա-կիմերական ցեղերի լեզվի համար, հայերենի և թուրքերենի նման, ենթադրվում է հ.-հ. d > t անցումը (տե՛ս М. Фасмер, Этимологический словарь русского языка, т. I, М., 1964, էջ 528—529):

²⁹ Н. Адонц, Армения в эпоху Юстиниана, էջ 425: Гр. Капанцян, Историко-лингвистические работы, т. II, էջ 122—123: 2. Մանանդյան, նշվ. աշխ., էջ 40:

րևի միջև, հուշում են, որ Գուշարի անձնավորած էթնիկական տարրը, այսինքն՝ գուգար ցեղը, պետք է պատկաներ թրակա-կիմերական ցեղերի սարապարա-տրերական խմբավորմանը³⁰։ Նշանակում է, դուգարները Հայկական լեռնաշխարհի հյուսիսում պետք է հայտնվեին սարապարների և տրերների հետ միասին, հավանաբար, թրակա-կիմերական ցեղերի մ. թ. ա. VIII դարի մեծ ներխուժման ընթացքում։

Եթե Պլինիոսի վերոբերյալ հաղորդման մեջ Տասիև (Տաշիր) և Թրիարև (Թուղթ) երկրանունների համատեղ գործածության փաստը համարենք Հայկական լեռնաշխարհի հյուսիսում թրակա-կիմերական ցեղերի ստեղծած երկամիասնական (դուալ) կառուցվածքով մի ցեղամիության երբեմնի գոյության մասին վկայություն, ապա կարող ենք ենթադրել, որ այդ ցեղամիության մեջ որպես հավասարազոր, բայց առանձին, վարչա-քաղաքական միավորներ հանդես են եկել Տասիևն (գուգարների գլխավորությամբ) և Թրիարևն (տրերների գլխավորությամբ)։ Այս տեսանկյունից նայելիս նոր իմաստ են ստանում Գուգարքի և հարակից շրջանների հին հայկական իշխող տոհմերի ծագման և տիրույթների վերաբերյալ Մովսես Խորենացու հաղորդած հետևյալ տեղեկությունները. «Իսկ Գուշարայ, որ յորդոցն Շարայի, ժառանգեաց զԼեառն Մթին, որ է Կանդարք, եւ զԷս մասինն Զաւախաց, զԿողբ, զՄոբ, զՁոր, մինչև ցամուրն Հնարակերտ։ Բայց զտէրութիւնն Աշոցայ, եւ զսեպահականութիւնն Տաշրաց կարգէ Վաղարշակ ի զաւակացն Գուշարայ Հայկազնոյ։ Իսկ ընդդէմ լերինն Կաւկասայ կողմնակալ հիւսիսոյ կարգէ զմեծ եւ զհօր ազգն, եւ նահապետութեանն անուն կարդայ բոնաշխ Գուգարացոց, որ էր լեալ ի զաւակէ Միհրդատայ, Դարեհի նախարարի. զոր ածեալ Աղեքսանդրի՝ թողու իշխան ի վերայ գերութեանն ի Վերիացոց ազգացն, զոր էած նաբուզոդոնոսոր, որպէս Աբիդենոս պատմէ...»³¹։

Ինչպես տեսնում ենք, Մովսես Խորենացին Գուգարքում և հարակից շրջաններում հիշատակում է հին հայկական իշխող տոհմերի երկու խմբավորումներ՝ Գուշարի զարմերինը և ոմն Միհրդատից սերած համարվող Գուգարաց (Վրաց) բոնաշխներին։ Առաջինների տիրույթները գտնվում էին հարավում՝ բռնելով հետագա Զավախք (Զաւախք վերին), Աշոցք, Տաշիր (նաև Տաշիր վերին), Մոբ (Մոբոփոր), Ձոր (Ձորոփոր), Կողբ (Կողբոփոր) և Կան-

³⁰ Ն. Աղոնցի ենթադրությամբ, գուգարները եկել էին հյուսիսից և ներկայացնում էին ստրաբոնյան գարգարացիների (այժմյան ինգուշների նախնիների) Հայկական լեռնաշխարհ ներխուժած առաջին ալիքը (Н. Алоян, Армения в эпоху Юстиниана, էջ 424, ծան. 3)։ Այս ենթադրության առաջին մասը, որն ընդունվեց հետագա ուսումնասիրողների կողմից, ընդունելի է այսօր ևս։ Սակայն երկրորդ մասը չընդունվեց և անընդունելի է, թեկուզև այն պատճառով, որ Ստրաբոնը, տեղյակ լինելով և՛ Գուգարք (Γαυγαρυς) երկրի, և՛ գարգարացի (Γαργαρεϊς) ցեղի գոյությանը, ոչ մի ակնարկ չի անում դրանց աղբյուրի վերաբերյալ։ Ն. Աղոնցն ինքը, գուգարների և գարգարացիների ծագումնաբանական կապի մասին իր ենթադրությունը թողեց սրակ ենթադրություն, հետագայում ևս ոչ մի փաստարկ չբերելով նրա հիմնավորման համար։ Իսկ Հ. Մանանդյանը, փաստորեն, մերժեց այն՝ իր հերթին գուգարներին վերագրելով սկյութա-սարմատական ծագում (Հ. Մանանդյան, նշվ. աշխ., էջ 38—40)։ Վերջին ղեկավարում Հ. Մանանդյանը հիմնվում էր գուգարների էպոնիմ Գուշարի և Շարայի սերտ ազգակցության փաստի վրա։ Սակայն, ինչպես վերևում ցույց տրվեց, Շարան էպոնիմն էր Շիրակի տարածքում հաստատված ոչ թե սկյութա-սարմատական, այլ սարապարական էթնիկական տարրի։

³¹ Խորենացի, Ի, ր։

զարք գավառները, իսկ երկրորդներին՝ հյուսիսում, բռնելով հետադա թռեղք, Մանգլեաց փոքր, Պարուար, Խանցիխե, Քուիշափոք, Բողնոփոք գավառները³² և, ըստ երևույթին, Վիրքի (Քարվի) հովտային մասը («Ընդդէմ լերինն Կաւկասայ»):

Պլինիոսի և Խորենացու հաղորդած տեղեկությունների համադրումից կարելի է ընկալել, որ Հայկական լեռնաշխարհի հյուսիս-արևելքում՝ Փամբակի լեռնաշղթայի և Կուր գետի միջև, իրոք, ժամանակին գոյություն են ունեցել մեկ ցեղամիության մեջ ընդգրկված երկու առանձին վարչա-քաղաքական միավորներ: Դրանցից առաջինը՝ Պլինիոսի Տասին (ըստ Խորենացու՝ Գուշարի և նրա զարմերի տիրույթները) բռնել է հիշյալ տարածքի հարավը, իսկ երկրորդը՝ Պլինիոսի Թրիարեն (ըստ Խորենացու՝ Միհրդատի իշխանության տակ գրված և իվերիացի-վերիացիներով բնակեցված շրջանները) բռնել է այդ նույն տարածքի հյուսիսը: Պետք է ենթադրել, որ հարավում՝ Տասիեում (Տաշիրը՝ լայն սահմաններում) իշխել են գուգարները, որոնց էպոնիմն է հենց Գուշարը, իսկ հյուսիսում՝ Թրիարեում (Թռեղքը՝ լայն սահմաններում) իշխել են տրերները, որոնց անունն էր կրում երկիրն ինքը: Ստորև բերվող Տաշիր և *Իվիր³³ տեղանունների ստուգաբանությունները, կարծես, հաստատում են «Տասիե և Թրիարեն» ցեղամիության երկմիասնական կառուցվածքի և նրա բաղադրատարրերը հանդիսացած վարչա-քաղաքական զույգ միավորների վերաբերյալ ասվածների ճշմարտացիությունը:

Հայտնի է, որ հին արևապաշտ ժողովուրդները, ի թիվս որոնց և հնդեվրոպացիները, աշխարհի կողմերը որոշելիս դեմքով դառնում էին դեպի արևելք (արևածագի վայրը): Այստեղից էլ՝ նրանց բոլորի, և մասնավորապես հնդեվրոպացիների, լեզվամտածողության մեջ տեղի ունեցած մի կողմից «աջ» և «հարավ», մյուս կողմից «ձախ» և «հյուսիս» հասկացությունների մերձեցումը, իսկ երբեմն էլ դրանց ուղղակի նույնացումը: Ըստ այսմ, մենք հակված ենք Տաշիր և *Իվիր երկրանունների գոյությունը համարելու նման նույնացման մի արտահայտություն՝ դրանց մեջ առանձնացնելով հնդեվրոպական նախալեզվի *deks- «աջ» և *seu- «ձախ» արմատներն ու -er մասնիկը:

Տաշիր երկրանվան տաշ- բաղադրիչը պետք է առաջացած լինի հ.-ե. *deks- «աջ» արմատի հետագա *desk- զարգացումից (-ks->-sk- շրջմամբ)³⁴: Այս նույն արմատը պարունակող հին հնդկերեն daksina-s բառը կիրառվել է ոչ միայն «աջ», այլև «հարավային» իմաստով, երբ ազգա-

³² Գավառների ցուցակը բերել ենք ըստ «Աշխարհացոյցի»՝ ելնելով Խորենացու հաղորդած տեղեկություններից (տե՛ս Ս. Ն. Երեմյան, Հայաստանը ըստ «Աշխարհացոյցի»-ի, քարտեզը):

³³ *Իվիր տեղանունն է ընկած հին հայերի կողմից քարվելական էթնիկական տարրին տրված վիր- (որտեղից էլ վիր՝ «Քարթլի») և *վիր-ացի>վրացի անվանումների հիմքում: Նույն այս տեղանունից եկող իվերիացի կամ վերիացի ձևերը կրում են հունական միջնորդության կնիքը (հմտ. հուն. Ἰβήρη «Քարթլի» և Ἰβηρία «Քարթլի» = *իվիր և *իվիր. ավելի մանրամասն տե՛ս ստորև):

³⁴ Հ.-ե. d>հայ. տ անցման համար հմտ. *dōm>տուն, *dig>տիկ, *diw->տիւ և այլն (տե՛ս Հ. Աճառյան, Հայոց լեզվի պատմություն, մասն Ա, Երևան, 1940, էջ 74, 76): Իսկ հ.-ե. -sk->հայ. շ անցման համար հմտ. *skel- շիկ, *sker-d->շերտ, *sked->շիր և այլն (տե՛ս Г. Б. Джаукян, Очерки по истории дописменного периода армянского языка, Ереван, 1967, էջ 260—261):

կից մյուս լեզուների նույնարմատ համապատասխան բառերը պահել են իրենց նախնական «աջ» իմաստը³⁵, իսկ *Խվիր երկրանվան իվ- բաղադրիչը սերում է հ.-ե. *seu- «ձախ» արմատից: Ըստ երևույթին, այս նույն արմատն է ընկած ինչպես հայերեն հիւսիս, այնպես էլ ռուսերեն север և լիտվերեն šiaurė նույնիմաստ բառերի հիմքում³⁶: Ինչ վերաբերում է քննարկվող երկրանունների երկրորդ -իր, բաղադրիչներին, ապա դրանք պետք է բխեցնել հ.-ե. -er մասնիկից, որը կիրառվել է երկու իրար հակադիր հասկացություններ արտահայտող մակբայների կազմության ժամանակ ևս³⁷:

Որպես օրինակ աշխարհի հակադիր կողմերը նշող բառերի գտած տեղանվանական կիրառության կարելի է բերել, թեկուզև, հին արաբական Եմեն (Արաբական թերակղզու հարավում) և Շամ (Ասորիք՝ Արաբական թերակղզուց հյուսիս) երկրանունները: Սրանցից առաջինը՝ Եմեն-ը, բառացիորեն նշանակում է «աջ» > «հարավ», իսկ երկրորդը՝ Շամ-ը, նշանակում է «ձախ» > «հյուսիս»: Այս երկրանունների գոյությունը պայմանավորված է բուն Արաբիայի գրաված աշխարհագրական դիրքով՝ հարավից Եմենի, իսկ հյուսիսից Շամ-Ասորիքի միջև³⁸:

Այսպիսով, Տաշիր և *Խվիր երկրանունների հնդեվրոպական-հայկական ստուգաբանությունները ևս ենթադրել են տալիս, որ «Տասիե և Թրիարե» ցեղամիությունն ունեցել է երկմիասնական կառուցվածք: Ըստ երևույթին, ցեղամիությունը կազմած վարչա-քաղաքական միավորներից հարավայինը իր գրաված դիրքի պատճառով կոչվել է Տասիե (Տաշիր, այսինքն՝ «հարավ»), իսկ այն գլխավորած ցեղի անունով՝ Կուգարի: Ցեղամիությունը կազմած վարչա-քաղաքական միավորներից հյուսիսայինը իր գրաված աշխարհագրական դիրքի պատճառով կոչվել է *Խվիր (այսինքն՝ «հյուսիս»), իսկ այն գլխավորած ցեղի անունով՝ Թրիարե (Թռեղք): Միևնույն ժամանակ պարզ է դառնում, որ *Խվիր երկրանունը, որպես հիշյալ տարածքի հյուսիսը գրաված Թրիարե երկրի երկրորդ անուն, անխզելի իմաստային կապի մեջ է այդ նույն

³⁵ Տե՛ս Հ. Աճառյան, Հայերեն արմատական բառարան, հատ. Ա, Երևան, 1971, էջ 246 և Մ. Фасмер, Этимологический словарь русского языка, т. I, էջ 506:

³⁶ Ի տարբերություն *Խվիր տեղանվան, հայերեն հիւսիս բառի մեջ հ.-ե. *seu- արմատի նախաձայն s-ն ոչ թե ընկել է, այլ վերածվել հ-ի: Հ.-ե. s-ի այսպիսի փոխակերպումները (երբ մի դեպքում այն ընկնում է, մյուսում՝ վերածվում հ-ի) օրինաչափ են հայերենի հնչյունաբանության տեսանկյունից (տե՛ս Հ. Աճառյան, Հայոց լեզվի պատմություն, մասն Ա, էջ 32, 36, 38, 58, 60): Ռուսերեն север բառի տակ բերած իր ծանոթագրության մեջ Մ. Ֆասմերի երկի ռուսերեն թարգմանիչ Օ. Տրուբաչովը, север < հ.-ե. *k'eu- տեսակետից բացի, բերում է մեկ ուրիշ տեսակետ, համաձայն որի բալթիկ-սլավոնական լեզուների համապատասխան բառերը սերած են համարվում հ.-ե. *seu- «ձախ» արմատից (տե՛ս Մ. Фасмер, նույն տեղում, т. III, М., 1971, էջ 588—589):

³⁷ Հ. Աճառյան, Լիակատար քերականություն հայոց լեզվի, հատ. 3, Երևան, 1957, էջ 110: Տաշիր և *Խվիր երկրանունների տաշ- (< *desk- < *deks-) և իվ = հիւ (< *seu-) արմատները հակադիր հասկացություններ են արտահայտում ինչպես «աջ» և «ձախ», այնպես էլ «հարավ» և «հյուսիս» նշանակությամբ:

³⁸ Հին արաբները ևս կողմնորոշվում էին դեմքով դեպի արևելք դարձած: Այստեղից էլ՝ բերված երկրանուններում առկա «աջ» > «հարավ» և «ձախ» > «հյուսիս» իմաստային անցումները (տե՛ս Е. А. Белаяев, Арабы, ислам и Арабский халифат в раннее средневековье, М., 1966, էջ 36):

տարածքի հարավը գրաված նախնական Գուգարքի (Գուշարի և նրա զարմե-
րի տիրույթները) երկրորդ անվան՝ Տաշիր-ի հետ:

Վերջինիս կապակցությամբ ուշագրավ է այն փաստը, որ հին հայերը
*տաշիր (այսինքն՝ «աջ» > «հարավ») և *իվիր (այսինքն՝ «ձախ» > «հյուսիս»)
բառերը կիրառել են ինչպես համանուն երկրները, այնպես էլ դրանց մեջ
գտնվող որոշ աշխարհագրական օբյեկտներ և դրանց բնակիչներին նշելու
համար: Կուրի աջակողմյան-հարավային վտակներից մեկը՝ հետագա Կամեն-
կան, այժմյան Զորագետը, հին հայերը կոչում էին Տաշրաջուր (իսկ նրա վե-
րին հոսանքի շրջանը գրավող լողվա սարահարթը՝ Տաշրատալի)³⁹: Նույն
կերպ *իվիր էր կոչվելու Կուրի ձախակողմյան-հյուսիսային վտակներից մե-
կը՝ հավանաբար այժմյան Քվաբլիանի գետը (սկիզբ է առնում Մեսիական
լեռնաշղթայի հարավային լանջերից և Կուրի մեջ թափվում Ախալցխիսից
ներքև): Պլինիոսը հիշատակում է այն Իբեր անվամբ՝ մոսխերի երկրի մինչև
նրա ափերը տարածված լինելու կապակցությամբ⁴⁰: Հին Տաշիրի (Տասիև)
բնակիչները պետք է կոչվեին *տաշիրե, որից էլ կազմվել է Տաշիր երկրան-
վան Տաշիր (սեռ. Տաշրաց) տարբերակը: Ժիշտ նույն կերպ հին *իվիրի
(Թրիարե) բնակիչները պետք է կոչվեին *իվիրե, որից էլ մի կողմից հայերեն
վիր (նաև *վիր-ացի > վրացի), մյուս կողմից հունարեն Ἰβήρη (-ηρος), Ἰβή-
ρης (> լատին. Ibēres, Ibēri) ցեղանունները⁴¹: Այս վերջին ձևերն իրենց հեր-
թին տվել են հայերեն վիր (սեռ. վրաց) և հունարեն Ἰβήρη (լատին. Iberia)
երկրանունները:

Վիր (< *իվիր) ցեղանվան հնդեվրոպական-հայկական ծագումը հնարա-
վոր է նրանով էս, որ քարթվելական ցեղերն իրենք իրենց երբեք աչղպես չեն
կոչել: Ժիշտ նույն կերպ հայերին տրված քարթվելական սոմխի անվամբ
հայերն իրենք իրենց երբեք չեն կոչել, որովհետև այն ունի զուտ քարթվելա-
կան ծագում⁴²: Վիր (< *իվիր) անվան «քարթվելացումը» (օտարների կողմից
դրա զուտ քարթվելական էթնիկական տարրին վերագրումը) տեղի է ունեցել
*իվիր (Թրիարե) երկրի ոչ-քարթվելական բնակչության, այդ թվում նաև
տրեքների տեղական հատվածի, քարթվելացմանը զուգընթաց: Այս վերջին

³⁹ Strab. II. 5. երեւմյան, Հայաստանը ըստ «Աշխարհացոյց»-ի. էջ 85:

⁴⁰ Plin., NH, VI, 11.

⁴¹ Հաղիվ թե Ἰβήρη = Ibēres ցեղանունը առնչություն ունենա Սպեր գավառի անվան
հետ: Հայտնի է, որ Սպեր կոչվում էր հետագա Մեծ Հայքի այն գավառը, որտեղ ճորոխ գետը
գծում էր իր նշանավոր աղեղը՝ շրջադարձից հետո հոսելով իր նախնական ընթացքին ճիշտ հա-
կառակ ուղղությամբ: Ըստ այսմ, Սպեր տեղանվան (երկրանվան) հիմքում պետք է ընկած լինի
հ.-ե. *-(s)per- («ոլորել, պտտել», «պտրուրել, գրկել») արմատը: Մեր տեղանվանը մոտ են
կանգնած հատկապես հունարեն επείρα («աղեղ, գալար, ոլորան») և լատիներեն spirā («պտ-
րույր, գալար») նույնածագում բառերը: Ինչ վերաբերում է Սպերի հին բնակիչներին տրված
Ἰβήρη և նման անվանումներին, ապա դրանք Սպեր տեղանունից կազմված *sper-il
անվան հունական (իմաստավորված կամ աղավաղված) ձևերն են:

⁴² Հայերին տրվող սոմխի անունը քարթվելական ցեղերի միջոցով անցել էր Հյուսիսային
կովկաս: Այսօր էլ օսերն այդպես են կոչում հայերին (som li s om ha et «հայ», somihaegta
«հայեր»): Եթե հայերին օսերը կոչում էին հայերի և իրենց միջև բնակված քարթվելական
ցեղերի կողմից նրանց տրված սոմխի—սոմիլ անվամբ, ապա դարձանալի ոչինչ չկա՝ որ
քարթվելներին նշելու համար փոքրատիացի հույները կարող էին գործածել իրենց և քարթվե-
լական ցեղերի միջև բնակված հայերի կողմից վերջիններիս տրված *իվիր—Ἰβήρη անունը:

պրոցեսի հետևանքն է, մասնավորապես, նախկինում տրերաբնակ գավառներից մեկի Թռեղֆ անունը. Թռեղֆ < *Թռիաղ-ֆ (= Թռիալ-ք): Եթե այս գավառը բնակեցրած տրերները քարթվելացած շինեին, ապա լատինական Thriare և քարթվելական Թրիալեթի (< Թրիալ-եթի < *Թրիար-եթի) ձևերի դիմաց սպասելի էին հայկական *Թրեբֆ (< *Թրիար-ք) կամ *Թռեբֆ (< *Թռիար-ք) ձևերը:

Ըստ երևույթին, մ. թ. ա. V դարի վերջից սկսած «Տասիե և Թրիարե» ցեղամիությունը ապրել էր վերելքի և ընդարձակման մի ժամանակաշրջան: Այս իրադարձություններն են, հավանաբար, արտացոլված Պլինիոսի հետևյալ տողերում. «Թասիեի (հավանորեն, Տաշիը) և Տրիարեի (հավանորեն, Թրիալեթ) երկիրը տարածվում էր մինչև Պարիադրեսյան լեռները. սրանց վերևում էին Կողքիսի ամալի տեղերը, որոնց կողքին, Կերավնյան լեռների դիմաց, ապրում են արմենոխալյուբները: Մոսխերի երկիրները ձգվում են մինչև Իբեր գետը, որը թափվում է Կուր գետի մեջ, իսկ սրանց տակն են սակասանները (sacassani) և ապա մակրոնները մինչև Ապսարուս գետը»⁴³:

Ինչպես տեսնում ենք, Պլինիոսը «Տասիե և Թրիարե» ցեղամիության հյուսիս-արևմտյան սահմանը հասցնում էր մինչև Կողքիս, արևմտյանը՝ Պարիսար (Պարիադրես) լեռներ, իսկ հարավ-արևմտյանը՝ Սպեր (արմենոխալյուբների երկիրը): Նշանակում է, ինչ-որ ժամանակ «Տասիա և Թրիարե» ցեղամիությունը ներառում էր նաև այն շրջանները, որոնք տարածվում էին արևելքից՝ ցեղամիության բուն տարածքի, արևմուտքից՝ Պարիսար լեռների, հյուսիսից՝ Կողքիսի և հարավ-արևմուտքից՝ Սպերի միջև: Իսկ դրանք կազմում էին Ստրաբոնի հիշատակած Մոսքիկե (Μοσχική) երկիրն⁴⁴ ու հետագա Տայք նահանգի հյուսիսային գավառները (Ճակքը և Արսեաց փորը)⁴⁵:

«Տասիե և Թրիարե» ցեղամիության մեջ ընդգրկված հողերի այսպիսի տեղադրության շնորհիվ իր լուծումն է ստանում Պլինիոսի հաղորդման առաջին և երկրորդ մասերի միջև առկա (թվացող) հակասությունը⁴⁶: Բանն այն է, որ իր հաղորդման առաջին մասում Պլինիոսը անում է «Տասիե և Թրիարե» ցեղամիության նոր ընդարձակ սահմանների նկարագրությունը, իսկ երկրորդ մասում խոսում է այն ցեղերի (մոսխեր, սակասաններ, մակրոններ) և նրանց ցեղային երկրների մասին, որոնք նոր էին ընդգրկվել ցեղամիության մեջ⁴⁷:

* * *

Հայերենակիր էթնիկական տարրը իր հինթրակյան մյուս ցեղակիցների հետ միասին Հայկական լեռնաշխարհի հյուսիսային և հյուսիս-արևելյան շրջաններն էր թափանցել դեռևս սարապարների գլխավորած «Շարալի» ցեղամիության և զուգարների ու տրերների գլխավորած «Տասիե և Թրիարե» ցեղամիության կազմավորումից դարեր առաջ: Մ. թ. ա. VI—V դդ., երբ այս-

⁴³ Plin., NH, VI, 11 (տե՛ս Հ. Մանանդյան, Նշվ. աշխ., էջ 12):

⁴⁴ Strabo, XI, 1, 18 (տե՛ս Ս. Նրեմյան, Հայաստանը ըստ «Աշխարհացոյց»-ի, էջ 50, 79, 119):

⁴⁵ Տե՛ս Ս. Նրեմյան, Նշվ. աշխ., քարտեզը:

⁴⁶ Դրա պատճառը, հավանաբար, այն է, որ Պլինիոսը խիստ համոզուել է իր աղբյուրի ավելի մանրամասն հաղորդումը:

⁴⁷ Մոսխերից՝ արավ և հարավ-արևմուտք ընկած սակասանների և մակրոնների միջև

տեղ գոյություն ունեին խնդրո առարկա ցեղամիությունները, հայերենակիր էթնիկական տարրը իր թրակա-փոյուղական և թրակա-կիմերական ազդակիցների հետ միասին կազմում էր այդ ցեղամիություններից առաջինի և երկրորդի հարավային մասի բնակչության մեծամասնությունը (փոքրամասնությունը ներկայացնելու էին հիմնականում հինկովկասյան և իրանա-սկյութական էթնիկական տարրերը): «Շարայի» ու «Տասիև և Թրիարև» ցեղամիությունների գոյության ընթացքում, մյուս ոչ հայախոս էթնիկական տարրերի նման, նրանցում իշխող թրակա-կիմերական ցեղերի հիմնական մասը (ի թիվս որում և սարապարներն ու գուգարները) նույնպես դարձել էին հայախոս՝ զրանով իսկ ամենակարևոր քայլն անելով կազմավորվող հայ էթնոսի մեջ ընդգրկվելու ճանապարհին⁴⁸։ Այս պրոցեսի ավարտի արտացոլումը պետք է համարել այն, որ հին հայկական ավանդազրույցներում Շարան՝ սարապարների ու նրանց զխավորած ցեղամիության էպոնիմը, և Գուգարը՝ գուգարների ու նախնական Գուգարքի էպոնիմը, արմենների էպոնիմների (Արամայակ, Արամայիս, Արամ)⁴⁹ հետ միասին դասված են Հայկի՝ կազմավորված հայ ժողովրդի ընդհանուր էպոնիմ-նախնու, սերունդների շարքը⁵⁰։

Այս տեսանկյունից ուշադրության է արժանի ֆրանսիացի գիտնական Լ. Կավենյակի առաջ քաշած տեսակետը։ Հայկական լեոնաշխարհում հայերենի տաքածման փաստը նա կապում է թրակա-կիմերական ցեղերի, և հատկապես տրերների, այստեղ հայտնվելու հետ⁵¹։ Անտարակույս, ֆրանսիացի գիտնականը գերադնահատում է այս գործում տրերների ունեցած դերը, սակայն, պետք է կարծել, որ ինչպես նրանք, այնպես էլ թրակա-կիմերական ուրիշ ցեղեր խոսել են նախահայերենին մոտ ազդակից լեզուներով և արմենական ցեղերի հետ միասին իրենց ներդրումը կատարել նախահայերենը լեոնաշխարհի բնակչության համար նախ միջցեղային հաղորդակցման միջոց, ապա և համընդհանուր խոսակցական լեզու (իր առանձին բարբառներով) զարգնելու գործում։ Այս առիթով հիշենք, որ հայերենում ի հայտ է գալիս թրակերենին մոտ մի բաղադրատարր։ Գ. Բ. Ջահուկյանի հոգվածներից մեկում կարելի է հանդիպել այսպիսի տողերի. «Այսպիսով, լիովին հնարավոր է, որ հայերենում պահպանված հնդեվրոպական շատ արմատներ, որոնք անմիջապես չեն գալիս հնդեվրոպական լեզվից և հայերենի բուն հնդեվրո-

սահմանի դեր է, կատարում Ապսարուս (Ճորոխ) գետի Քանի որ մակրոնները զբաղեցնում էին Պարիսարի լեոնալանջերը, ուստի սակասանները, որպես նրանց, մոսխերի և արմենախոյրների (Սպերում) հարևաններ, բնակվելու էին հետագա Տայրի ճակր և Արսևաց փոքր գավառներում (ուրեմն, հնարավոր է, որ sacassan- < *ճակ-ա-ճան, հմմտ., օրինակ, առմեն-ո-խալլը-էթնիկական անվանումը՝ նույնպես երկցեղանվանական կազմությամբ)։

⁴⁸ «Տասիև և Թրիարև» ցեղամիության հյուսիսային մասում, նույն այդ ժամանակաշրջանում ընթացած բարձրագույն պրոցեսի հետևանքով, տեղի թրակա-կիմերական ցեղերի հիմնական մասը իշխող տրերների հետ միասին դարձել էր բարձրակարգ և հետագայում ընդգրկվել կազմավորվող վրաց (բարձրակարգ) ժողովրդի կազմի մեջ։ Այս առումով պատահական չէ, որ, ի տարբերություն գուգարների էպոնիմ Գուգարի, տրերների էպոնիմին չենք հանդիպում Հայկի սերունդների տոհմաբանության մեջ։

⁴⁹ Г. Р. К а п а ц я н, Историко-лингвистические работы, т. I, էջ 179։

⁵⁰ Ե ո ռ ե ն ա ճ ի, Ա. Ժ. և Բ., ր։

⁵¹ E. Cavaignac, L'origine des Arméniens, „Revue hittite et asianique“, XXI, 72, 1963, էջ 47—54։

պական միջուկին չեն պատկանում, ունեն հայաստական և թրակյան ծագում»⁵²։

Հետազայում, ըստ երևույթին մ. թ. ա. VI դարի ընթացքում, երբ Շիրակ-Արշարունիքը և հարավային Բուզարքը ընդգրկվեցին Երվանդունիների Այրարատյան թագավորության կազմի մեջ⁵³, նրանց բնակչությունն հիմնականում արդեն հայկական էր։ Հաջորդ հարյուրամյակում խնդրո առարկա շրջանների բնակչությունն իր վերջին քայլերն արեց միասնական հայ ժողովրդի կազմի մեջ ընդգրկվելու ճանապարհին։ Այս առումով հատկանշական է, որ Երվանդունիների Այրարատյան թագավորության անկմանը հաջորդած ժամանակաշրջանի՝ մ. թ. ա. II դարի Հայաստանի բնակչությունը Ստրաբոնը բնութագրում էր «բոլորը միալեզու են» բառերով⁵⁴։

ФРАКО-КИММЕРИЙСКИЕ ПЛЕМЕННЫЕ СОЮЗЫ НА АРМЯНСКОМ НАГОРЬЕ (VI—V вв. до н. э.)

С. Г. ПЕТРОСЯН

(Резюме)

В XII в. до н. э. после падения Хеттской державы часть так называемой фрако-фригийской группы древнефракийских племен вторглась через Малую Азию в Армянское нагорье. Эту группу составляли мисийцы (фригийцы), аримы (армены), одоманты, мокснаны и другие. Племена другой, так называемой фрако-киммерийской, группы древнефракийских племен—киммерийцы, сарапары, треры и другие,—продвигаясь через Кавказ, появились на севере Армянского нагорья.

В ассирийских источниках начиная с 722—715 гг. до н. э. упоминается «страна Гампра», которую локализуют на севере Армянского нагорья, включая будущую Гогарену. Здесь наряду с киммерийцами (арм. *գամիր-ք*, гампр-к) жили также родственные им треры и гогары.

На севере будущей Гогарены, к югу от Куры находилась «страна Трнаере» (арм. *Թռեղ-ք*, Трел-к, груз. Триал-ети), которую Плиний упоминает вместе со страной Таспе (арм. *Տաշիր-ք*, Ташир-к), занимавшей южные районы той же Гогарены, как одно целое. На основании этого упоминания и того, что названия *Вир-к* < **Ивир-к* (Трнаере—район обитания треров) и *Ташир-к* (Гогарена—район обитания гогаров) образуют двуединство: **Ивир* < н.-е **seu*-«левый»+-ег, *Ташир* < н.-е **deks*-«правый»+-ег, можно заключить, что на территории будущей Гогарены некогда существовал племенной союз треров и гогаров.

⁵² Գ. Բ. Զահուկյան, Հայաստանի լեզվի հինանատոյիական ծագման վարկածը, «Պատմա-բանասիրական հանդես», 1976, № 1, էջ 108։

⁵³ Պատմական այս իրադարձություններն է, հավանաբար, արտացոլում հին հայկական ավանդադրույցների «Արմավիրյան շարքը»՝ Շարայի ծնունդը ղեկավարում (եռրենա քի, Ա, Ժր)։ Պրանով իսկ, Շարային և Գուշարին այն առնչում է Արմավիրին՝ Երվանդունիների այրարատյան բյուրի հնագույն կենտրոնին։

⁵⁴ Strabo, XI, 14, 5.

Юго-западнее и южнее Гогарены, в Шираке и Ашарунике, как вытекает из сообщений Страбона, обосновались сарапары. В названиях же *Шара* (эпоним Ширака и легендарный предок его жителей) и *Ашаруни-к* Гр. Капанцян выделил этнонимическую основу **шар(а)*. К этой последней, по нашему мнению, восходит и этноним сарапаров (*сарапар*—греческая передача местного названия **шарапар*).

Интересно, что в древнеармянских эпических сказаниях Шара, эпоним сарапаров, и Гушар, эпоним гогаров, считаются потомками Гайка. Так как Гайк—эпоним-предок всех армян, это значит, что сарапары и родственные им гогары впоследствии (не позднее III в. до н. э.) вошли в состав древнеармянского народа. Это косвенно подтверждает Страбон, который характеризует население Армении II в. до н. э. словами: «...все стали единойязычными (*ὁμόγλωττοι*)».